

Plooch unn Lache

Doo hott misch doch omm letzde Sunndaach de Schorsch oogerufe. Honnes, hodder gefroochd, was hosden doodefoo gehalle, dass die vumm Fernseh die Meenzer Sitzung abgesaad hawwe?

Nix, habb isch ze Ontwort gewwe, nix habb isch defoo gehalle. Unn alles, weil ooner Plooch e onner gefolchd iss: Grad werdd dess mett Corona e bissi wenischer schlimm, kimmt schunn die nächst, de Kriesch in de Ukraine unn die Zeidunge, dess Radio unn dess Fernseh sinn voll defoo. Awwer grad, weil merr nix mieh onnersders heert unn sieht, hädde die uns ruhisch sozesaache als Ablenkung vunn dem Gonse e bissi Spass gönne solle.

Seet de Schorsch: Waaßde Honnes, isch konns oofach nitt leide, dass su e paar Leit irschendwo hogge unn uns vorschreiw wolle, ob merr flenne odder lache solle. Dess gonse Lewe wär doch nix mieh wert, wenn merr alls nor unn in ooner Tour traurisch wärn. Merr werdd joo schwermüdisch debel.

Ja Schorsch, saach isch, su isses. Awwer wär die Sitzung gesend worn, hätts in Meenz unn onnerstwo Demonstratione gewwe. Ess kimmt noch su weit, dass weesche dem Kriesch vor de Bäckereie demonstriert werdd weil die sich erlaue dun, su Fassenachtsgebäck wie Kreppel ze backe.

Dess kimmt aach noch, seet de Schorsch, wadds emol ab. Awwer saach emol, woher kimmt donn su ebbes wie dess Absetze vunn su ooner Sitzung?

Isch gebb ze Ontwor: Ess kann joo soi, dass die Dame unn Herrn vumm Fernseh dess nitt alloons gemachd hawwe.

Wie moonsden dess, Honnes?, frächt des Schorsch. Frooche die irschendwo erum? Isch habb ins Telefon geniggd. Ja, isch glaab, dess werdd in su Umfrooche ermittelt. Also: Omm letzde Freidaachmoie hawwe die villeischd tausend Mensche uff de Gass unn omm Telefon gefroochd, unn weil donn e paar mieh als die onnern gesaad hawwe, losst die Fassenacht soi, doo hawwe die dess gemachd su wie die meisde vunn dene Gefroochde dess gewollt hawwe.

De Schorsch war nitt iwwerzeuchd. Also Honnes, moonsde donn, dass die Mehrheit die Sitzung nitt wollt?

Isch habb enn Aacheblig iwwerleeschd. Schorsch, saache merr mol su: De Mehrheit isses egal. Vill Leit, wenn die gefroochd wern, zugge mett de Schulter unn giehn weider. Awwer su e bissi iwwer zwonnsisch Prozent vunn de Leit sinn degesche unn e bissi unner zwonnsisch Prozent sinn defür. Also werdd die Sitzung abgesaad.

Ach Honnes, dess glaab isch nitt, die Leit wolle doch lache.

Isch habb de Kobb geschiddeld. Naa Schorsch, nitt immer unn nitt allminonner. Wenn su ebbes wie de Kriesch in de Ukraine odder e Flutkatastroph im Ahrtal iss, derrf halt nitt gelachd wern. Denk onn de Laschet. Der hott bei de Iwwerschwemmung im Ahrtal gelachd, die gons Welt hotts geseh, und seit dere Zeit war der Monn unne dorsch unn hott sesomme mett de CDU die Wahl verlorn.

Ach Honnes, seet de Schorsch, doo wern merr halt zum Lache in de Keller gieh misse, doo siehts unn heerts kooner.

Noch nitt, saach isch, noch nitt, Schorsch.

Eiern Honnes